

# BOLETÍN EPIDEMIOLÓXICO DE GALICIA

VOL. VII / 1993 / NUM. 5  
SEMANAS 17-20 / 1993  
(25 abril / 22 maio 1993)



## PROGRAMA GALEGO DE PROMOCIÓN DA VIDA SEN TABACO (e II)

Documentos Técnicos de Saúde Pública. Serie A. N.º 3. Dirección Xeral de Saúde Pública

### C. ESTRATEXIA PARA GALICIA

Un informe do U.S. Department of Health and Human Services de 1991 sobre estratexias a adoptar para controla-lo uso do tabaco nos EE.UU., país da máxima experiencia e resultados neste tema, **conclúe que a combinación estratéxica de diversas intervencións demostradas eficaces e eficientes**, como o consello médico sistemático, o desenvolvemento e cumplimentación de lexislacións restrictivas do uso do tabaco e de defensa dos non fumadores, a potenciación da accesibilidade a programas formais para deixar de fumar, a utilización dos medios de comunicación de masas e medios propios (folletos informativos e guías para o abandono), a aplicación de programas preventivos eficaces na escola e o control do consumo de tabaco nos lugares de traballo, é a garantía da efectividade no control e prevención do tabaquismo nas comunidades.

A proposta para Galicia, cara á meta de conseguir reducir a curto prazo e a longo prazo deixar nunha cifra anecdótica o número de fumadores da nosa comunidade, tendo como principal estratexia a protección dos non fumadores, pódese definir como segue:

#### 1. INTERVENCIÓN NA POBOACIÓN XERAL NON FUMADORA

- Potencia-la educación para a saúde na escola, especialmente na prevención do tabaquismo e do alcoholismo.
- Xeneraliza-lo consello médico individual positivo e sistemático na atención primaria de saúde e a preocupación sobre o tabaquismo.
- Actualiza-la normativa autonómica de defensa dos non fumadores e facer un seguimento do seu cumprimento.
- Informar á poboación xeral sobre os riscos para a saúde provocados polo tabaquismo, aproveitando especialmente a celebración anual do Día Mundial sen Tabaco.

#### 2. INTERVENCIÓN NA POBOACIÓN XERAL FUMADORA

- Xeneraliza-lo consello médico individual sistemático na atención primaria de saúde.
- Asegura-la accesibilidade da «guía de autoaxuda para deixar de fumar» a tódolos fumadores que intenten deixa-lo hábito.
- Aumenta-la disponibilidade de determinados colectivos a programas específicos para deixar de fumar.
- Informar sobre os riscos para a saúde do tabaquismo, aproveitando a celebración mundial do Día Mundial sen Tabaco.
- Actualiza-la normativa autonómica de defensa dos non fumadores e facer seguimento do seu cumprimento.

#### 3. INTERVENCIÓN EN COLECTIVOS ESPECÍFICOS

- Facilitarles formación e información relativa ó tabaquismo e a súa prevención ós profesionais sanitarios, estudiantes de medicina e educadores.
- Asegurárlle-la disponibilidade do manual «Axudando ós meus pacientes a deixar de fumar» ós profesionais da saúde.
- Facilitarles información relativa ó tabaco ós xornalistas, parlamentarios, etc.
- Asegurárlle-la disponibilidade da «Guía de autoaxuda para deixar de fumar» a estes colectivos.
- Aumenta-la accesibilidade dos profesionais sanitarios, da educación e dos medios de comunicación, ós programas específicos para deixar de fumar.

#### 4. INTERVENCIÓNES INTERSECTORIAIS

Trátase da coordinación e unidade de acción con outros servicios dependentes das distintas administracións.

- Coa Consellería de Educación e Ordenación Universitaria para garantí-lo desenvolvemento de programas de prevención de drogodependencias, no marco da educación para a saúde como dimensión transversal dos currículos do ensino obligatorio.
- Coa Consellería de Cultura e Xuventude e a Secretaría Xeral para o Deporte, para garantí-la non promoción nin subvención de actos deportivos ou culturais nos que se fomente directa ou indirectamente o consumo de tabaco.
- Con tódalas Institucións Públicas e Administracións para garantí-lo cumprimento da normativa vixente nos

seus ámbitos, de xeito que os espacios pechados e corridos se manteñan libres de fume de tabaco.

- Coa Consellería de Industria e Comercio para garantí-lo control de tódalas actividades relacionadas co tabaco en Galicia e os seus posibles efectos nocivos sobre o medio ambiente e a saúde.

En xeral, conseguir que o maior número de institucións e colectivos da comunidade se impliquen no apoio activo ó Programa Galego de Promoción da vida sen Tabaco, dende o Parlamento e o Goberno galegos, ás asociacións profesionais e organizacións non gubernamentais que promocionan a saúde, como a «Asociación Española contra el Cáncer», apoio co que conta este Programa desde o comezo da súa planificación.




Figura 1: Estratexia de intervención

#### D. DESCRICIÓN XERAL DO PROGRAMA

Trátase agora de integra-los distintos elementos da nosa ampla estratexia nun plan de acción global de preventión e control do tabaquismo, facendo que funcionen, de xeito simultáneo e continuado no tempo, a preventión das drogodependencias no contexto da educación para a saúde na escola, a información permanente á poboación xeral sobre a problemática do tabaquismo e o xeito de abandonalo, aproveitando especialmente cada ano a celebración dos días mundiais sen tabaco, a xeneralización do consello e apoio médico sistemático nos servicios da Rede de atención primaria, a defensa do dereito dos non fumadores, nenos, embarazadas, compañeiros de traballo, etc... a respiraren aire libre de fume de tabaco, mediante a promulgación de normativa autonómica que permita o seu control e a aplicación de medidas sancionadoras no caso de ausencia do seu cumprimento, e a creación de unidades de deshabituación onde os fumadores poidan someterse a programas de abandono do tabaco.

No marco das recomendacións do Plan de Saúde de Galicia (obxectivos 35 ó 41), preténdese poñer en funcio-

namento un programa diferenciado e integral para o período de 1993-1997 que aborde o problema sanitario e social que representa o impacto do tabaquismo na saúde. A súa elaboración, presentación pública e comezo da súa andadura son a esencia da celebración en Galicia do Día Mundial sen Tabaco de 1993, orientado especificamente pola O.M.S. cara á mobilización dos profesionais do sistema sanitario.

A poboación diana do programa é toda a poboación de Galicia, como queda indicado na figura 1, aínda que se establezan estratexias parciais estreitamente ligadas a determinados colectivos, con individuos fumadores e non fumadores.

A participación activa no programa dos particulares, entidades ou institucións, canalizarse a través da Rede de Centros Promotores da vida sen tabaco, lugares onde se pode garantí-la contextualización e adaptación das actividades soportadas polo programa e que, coherentemente, adquieren unha importancia estratéxica.







Os requisitos e condicións para ser **Centro Promotor da vida sen tabaco** son os seguintes:

- Existencia dun problema en relación co tabaquismo.
- Grupo de intervención e coordinador do mesmo.
- Coñecemento e apoio da Dirección do Centro.
- Solicita-la pertenza á Rede de Centros Promotores á Unidade de Coordinación Periférica correspondente.
- Aplicación dunha enquisa que permita cuantificá-lo problema e establecer obxectivos.
- Fomenta-lo cumplimento da normativa de protección dos dereitos dos non fumadores.
- Facilita-la execución das actividades do programa no centro.
- Elaborar un informe anual de xestión e previsións.
- Aplicación da enquisa epidemiolóxica que permita a avaliación do programa no centro, cada dous anos de pertenza á Rede de Centros Promotores.

As **Unidades de Coordinación Periférica** (situadas nas Delegacións Provinciais da Consellería de Sanidade) dan de alta ós centros que así o soliciten e reúnan os devanditos criterios, e facilitan o apoio técnico e informativo necesario, o material de apoio, autoaxuda e sinalización que se precise, e calquera outra das prestacións do pro-

grama, como coordinación da formación de persoal, coordinación do acceso dos fumadores ás Unidades de Deshabituación, etc. Toda persoa ou entidade poderá obter información sobre o programa contactando con estas unidades de carácter provincial. En cada unha delas establecerase un Fondo Documental.

Nas **Unidades de Deshabituación**, integradas na Rede galega de centros de saúde mental ou de drogodependencias, procederase á aplicación do «programa para deixar de fumar» da Universidade de Santiago. Trátase de poder ofrecerelles ós fumadores de todo Centro Promotor a posibilidade de se someteren a un programa específico de deshabituación tabáquica. O acceso a estas Unidades será coordinado polas Unidades de Coordinación Periférica.

Na **Unidade de Coordinación Central** levarase a cabo a coordinación da xestión do programa e o seguimiento e avaliación global dos obxectivos acadados e actividades realizadas, xestionando ou facilitando as actividades das comisións. O programa puido ser elaborado, redactado e posto en funcionamento gracias á colaboración dos profesionais que componen a Comisión Asesora e de Seguimento e ó firme impulso e apoio da Dirección Xeral da Saúde Pública do Servicio Galego de Saúde.




Figura 2: Principais elementos organizativos do programa